



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tiryimyim@aolima tir yimyim TAPAK 7

AAP-i Rajya Sabha election atema
DCW tongti, Swati Maliwal shim

Israel minister-i rara sülen
Gaza atema sentong yanglur



VOL. XXI NO. 83 (ADOK 83) DIMAPUR KÜPTOKNÜ (SATURDAY) AENJETI (JANUARY) 06, 2024 ₹ 5.00

Aor Rejusanger Longzüng 7 azüngogo

Akhoya, January 05 (TYO): Yaküm 2023 küm January ita nung Ao Kaketshir Mungdang (AKM) 69 buba lokti senden aliba nüngten nung Akhoya yimtak Keyimeta Park nung long tongshi 7 azüngogo aser iba Aor Rejusanger Longzüngji tanü January 05 nü Wt.Anenla T. Sato, IAS-i sayatsüogo.

Item Long tongshi tenetemji AKM tongshi tiyong ser Ao lima tzükong 6 kaketshirtem Telongjem aser Mungdang shia meyong logo aser tenüng tongshi shia ajenloka lir.

Iba sentong nung tepela o jembidang, AKM 69 buba Local Planning Committee nung tayonger, Wb. T. Aochuba, IFS-i iba Rejusanger Longzüng ya Ao kin longjemba lozüng aser tesem ka asütsü ta metetdaksü.

Iba Longzüng sayaja jembidang, tongti tesemdanheri Ao kaketshirtem dang tamalen tsüraburtemi tesem balala nung mapa tajung inyakbatem asen senmang kümer ano nübortem asoshi mapa tajung inyaktsü



Ao Rejusanger Longzüng jakdang Wt.Anenla T Sato, IAS den AKM lenirtem noksa nung angur. (Akhoya, Jan.05,2023).



Akhoya nung Lijaba aser pa anendaksür Alala aser Nüngjala, par asem kürakyanglu.

asentenshists kanga nüngdaka kümogo ta metetdaksü. " Tanü putu nungbo academic degree ya tongtibangba masü saka mapa

inyak ashiba aser metetba-ang tongtibangba kümogo," ta laisa kaketshirtem ayongzüük. Iba sentong nungsa tetushi

tejaoker, AKM tir Sp.Lanutoshi Aieri jembidang, Akhoya yim ya joko nokjusanger masü, yimti tulu klma Tsüngremi moatsüogo,

anungji asen lima aser nübortem asoshi ano maneni leniba tajung agüja inyaktsü ajungshi. (Maneni tapak 2 nung...)

Karbi Anglong NH-39 nung Time Card lateter

Sarihajan, January 5, 2024 (TYO): Gari lendong ajema kümdaksütsü aser public kümzüka ayutsü atema District Road Safety Committee, Karbi Anglong-i NH-39 nung Sarihajan tri junction nungi Silonijan tashi time card tenzüksü lemtetogo.

"NH-39 nung data bendenba sülen anepdang 5:00 nungi 9:00 aser nikongdang 3:00 nungi aonung 9:00 tashi atema time card agütsütsü" ta Superintendent of Police, Karbi Anglong Sanjiv Kumar Saikia-i ashi.

Tanü Sarihajan nung iba system tasen tenzükdang Saikia-i iba osang metetdaksü. Iba system atema pa Committee chairperson lir.

2023 küm Karbi Anglong district nung gari lendong balala nung nisung 79 taküm sama. Iba nungi lendong 33 tashi Nagaland den sendaktepba National Highway-39 nung Borpathar o

Bokajan tsüngda atalok. Gari lendong teimbaka 60kmph adena aniba ajanga atalokba liasü aser NH-39 nung atalokba lendongtem nung Nagaland garitem dena liasü, ta Saikia-i ashi.

"Iba system tasenba ajanga Sarihajan nungi Silonijan tashi minute 34 aser Garampani minute 40 matongdang madentsüla aser iba tetezü gariji 60kmph (speed limit) nung dang anitsüla. NH-39 nung anüngdang mobile police party mapa lemezüksütsü aser tashi mangartem Motor Vehicle Act nung lateta aliba ama merenshitsu" ta paisa ashi.

Iba system tasenba ya trial basis nung tenzüker aser tanga district tem nunga tenzüka aotsü. Anungji gari lendongtem noktangsü aser public kümzüka alitsü atema senso ajaki tashi angatsü mepishir, ta SP Karbi Anglong Saikia-isa ashi.

Assam transport strike agienogo

Guwahati, January 5, 2024 (Agencies): Assam nung commercial vehicle kiburtemi ghonda 48 mokdangba mapa ajemtsü lemtetogo.

Assam Motor Worker Association (AMWA) ketdangpurtemi mokdangba mapang ghonda 24 ajemba metetdaksüogo.

Iba lemtet ajanga Assam nung commercial garitem Honibarnep (January 6) 5:00 ako nungi senzütsü. Assam transport department den olemtepba sülen ANWA-i iba lemtet agia liasü.

Hokolbarnü Assam transport department ketdangsürtem aser AMWA ketdangpurtem tsüngda ghonda 5 senden amen.

Bharatiya Nyaya Sanhita (BNS) kübok hit-and-run law ano mapa küma metenzükba agi AMWA-i ghonda 24 dang mokdangtsü lemtet.

Sorkari yangluba hit-and-run ozüng ajanga driver kati gari mashii aniba ajanga nisung ka tsüksetra aser iba tesem toktsür jena ora küm 10 tashi tepuokdak ayutsü aser senchi achitsü ta lateta lir.

MLA Azo-i Küm Tasen nung nükla tasen ayutsü ayongzüük

Phek, January 5, 2023 (TYO): Alima nung party tulutibaji New Year lir aser nisung ajaki amonger. Iba anogo asenoki tejenba küm dang salem ashir aser tasenba küm tepela o teimla nung pelashishia agizüker ta NPF Legislature Party Leader Kuzholuzo Nienu-i ashi.

"New Year ya sayatenya aliba mapang ka mesüka lir. Iba ajanga asenoki tasen tenzüksü aser asen taküm nung tepela talila bener arutsü atema mapa tasenten inyakdang" ta Nienu-i ashi.

Asenoki küm ka tembangba aser tasen ka tenzüka atema benjungtepba mapang asenoki tesüiba küm kechisa atalok meyipa repringshidi. Asenoki tesüiba küm ajangshia arubatem atema peladi tarutsü dak teimla yur ranglokdi ta paisa ashi.

Asenoki New Year bangzüngtem renemdang yaküm takok aser tamakok ajurubatem meyipa repringshidi aser taruba küm atema sentongtem renemdi, ta MLA Nienu-isa ashi.

"Asenoki New Year pelashishia agizükdang asenok ajak atema kü temlung nung teti aliba aser asenoki süoki ia bilemetsüba onük kar lemsatepnür" ta paisa ashi.

"Naga nung aser atema tongtipang tebilemetsü rongnung kaji Naga Accord lir. Naga Political Groups den yimtenren

olemtep tembangba sülen India sorkari NSCN (IM) den August 3, 2015 nü Framework Agreement aser NNPGS den November 17, 2017 nü Agreed Position nung sign süteper" ta MLA Nienu-i ashi.

"Naga nung dang tetsükdaksü aliba onüktem ajak angatettepogo aser joko onük tila kar dang metembang lir ta ashi. NGOs, CSOs aser Naga nung den ajurutepa tebilembatem lemsatepogo aser Nagaland state sorkari Nagaland Legislative Assembly nung tashi agütsütsü atema sorkar anentsü mulunga lir ta sangoktsü" ta pai ashi.

"Naga nungeri yimjung aginüa Indo-Naga yimten ken o tekaraba nung angatetteptsü imlaa ata liasü. India sorkar Interlocutor-i October 31, 2019 nü yimjung olemtep tembangtsü anogo züngzüksü aser iba ya NPGs-ia mulunga agizük. Ajisüaka India sorkari tatembang lemtet ka agitsü atema mapang atsülanger aser iba ya kechi atema'ar parnoki dang metet" ta Nienu-isa metetdaksü.

Framework Agreement sign süteper küm 8 aser Agreed Position nung sign süteper küm 6 aser ano dateline süir küm pezü tema aruaka Naga Accord mali, ta paisa shisem.

"India sorkari mapang atsülanger ajanga 2019 küm Naga Political groups 16 aliba nungi tanübo 22 kümogo.

Anungji India sorkari nangzüka ama inyaktsüla aser joko Naga nung ojang dang ashioksütsüla" ta Kuzholuzo Nienu-isa ashi.

Ano, tongtipang tebilemetsü kaji India nung nübo agi tangar memenepeba tamangba yimsü amangertem dak tashiyim mapa inyakba lir, ta pai ashi.

"Constitution of India nung tamangba tsütsü talenba kecha mali aser National Human Rights Commission of India, National Commission for Minorities aser Non-Governmental Organisations ajanga mapa inyakaka India nung tamangba yimsü dak rangloker kanga dang bulua mapa inyaker" ta Azo-isa ashi.

Yimtenren lennirtemi Hindu tangatetba ajungketa onük balala jembiba ajanga India nung tamangba yimsü tsütsü mepetmesü lir. Hindu nung dak parnok tamangba yimsü amangtsü temeten aser iba nung tanga tamangba yimsü amangba külem India nung akhümtsübuttsü dena lir Human Rights Watch Asia Division Deputy Director Meenakshi Ganguly-i shiogo.

Ajisüaka Hindu telok kari BJP sorkar kübok Muslim aser Christian temamaker aser parnok tekülem kitem dak kongshiba dang masü saka parnok tepok mesüba maparen nunga kongshir, ta MLA Azo-i ashi.

(Maneni tapak 8 nung...)

Delhi nung January 13 nü Uttar Purvi Mahotsav 2024 tenzüksü



Kohima, Aenjeti/January 05 (TYO): Northeast India nung sobaliba balala aliba sayua anogo pungo atema Uttar Purvi Mahotsav sentong Bharat Mandapam, Pragati Maidan, New Delhi nung January 13-17, 2024 anogotem alitsü.

Iba sentong ya Ministry of Development of North Eastern Region ajanga ayongzüker aser North Eastern Handicrafts & Handlooms Development Corporation Limited (NEHHDC) ajanga ketdang asütsü.

Northeast India nung sobaliba balala aser traditional arts, crafts meyokteper sayutsü nükjidong nung Uttar Purvi Mahotsav mezüngbuba sentong ya ayongzüker alitsü. Uttar Purvi Mahotsav ya benjong ka dang masü saka rongsenketzüng tsütsü maongka balala atema sapang ka lir.

Northeast region aintsü aser terenlok atema tongtipang traditional handicrafts, handlooms, agro products aser tourism amala nüburtem dang sayutsü nükjidong nung iba benjongmung ya ayongzüker.

Iba benjong nung südaker, aluyimer aser entrepreneurs 250 arua shilem agitsü aser North East Region ya 'cultural jewel' kumda克斯üba lenla balala sayutsü sapang agütsütsü. Yangi Northeast India nung yanglutetba teka mapa, ola-angla, GI products, indigenous fruits aser organic product tem sayutsü.

Linük tejakleni aoba nung

region ajanga tongtipang shilem agiba angatetsü nükjidong nung "Towards Prosperity: Catalysing North East's Progress Towards a Viksit Bharat" onük nung ajemdaker takotet nisungtemi jembishinü alitsü. Yimchiyimjung nung rangloker Northeast nung ali rongsen indang jembitsü.

Maneni "Women Leaders in the Northeast" indang onük nung ajemdaker tetsür lenirtem aser parnoki region nung tongti shilem agiba jembitsü.

Kasa mapang "Northeast in Action" aser "Youth, Workforce, and the Economic Tapestry of India" omen nung ajemdaker jembitsü.

Iba benjongmung nung talir aser tayoker ajurutepa lenla balala nung jenjang aketba tesendaktep yangertsü. Iba mapang handlooms aser handicrafts, agro and allied products aser tourism nung tali rangloker sentong balala agitsü.

Iba sentong nung shilem agirtemi business tsütsü maongka balala bushitsü, tesendaktep yangertsü aser rongsenketzüng aintsü asoshi telok balala lungjemer inyaktü. Maneni Open Network for Digital Commerce (ONDC) partnership ajanga businesses tila temi digital commerce tashi amshiba nung yaritsü.

Iba benjongmung mapang January 14, 2024 nikongdang 5:00 ako nungi tenzuka sobaliba saya alitsü, kong Assam indang Satriya Dance aser Tripura indang Hojagiri Dance angutsü.

Iba den külemi nikongdang 5:30 ako nungi 7:00 ako tashi Fashion Show alitsü.

January 15, 2024 nü Manipur nungi Tangtha Fight, Sikkim nungi Lion Dance amala sayutsü.

January 16, 2024 nü sentong ya nikongdang 5:00 ako nungi tenzüksü aser iba mapang Mizoram nungi kentener telok kati ghonda ka ken atentsü aser iba sülen Manipur nungi kentenba alitsü.

January 17, 2024 bü Bottle Rockets India ajanga shilem agitsü aser iba sülen kentener aser kongki awar Sunita Bhuyan-i la sempet sayutsü.

Kasa mapang Meghalaya nungi Wangala Dance, Nagaland nungi Mungwanta Dance, Mizoram nungi Bamboo Dance, Assam nungi Bihu Dance den ano Tetseo Sisters aser Shankuraj Konwar nungeria shilem agitsü lir.

Uttar Purvi Mahotsav 2024 mapang Jawaharlal Nehru University (JNU) nung Barak Hostel semzüksü. Iba hostel nungya JNU nung züngner NER nungi kaketshir 400 tashi litettsü. Iba den külemi Dwarka nung North East Convention Centre ka atema nüngshilong azüngtsü.

Iba convention centre ya international standards den lirumedema yanglutsü aser ibai Delhi nung North East India indang sobaliba aser osangtsüsang angudak tesem ka ama amshitsü.

Kohima nung BJP Nagaland tanabuba senden amen



Kohima, Aenjeti/January 05 (TYO): Tanü Bharatiya Janata Party Nagaland State pur District BJP in-charges aser District BJP tirtem den aruya aliba Lok Sabha Election dak sendakba ken o jembitsü asoshi 2 buba shisadokden senden Kohima Head Office nung mena liasü.

Iba senden nung BJP Nagaland ketdangpur, State General Secretary (Org) Abhay Giri, State Spokespersons, State Media aser State Social Media team, District In-Charges aser District tir 12 dena liasü.

BJP Nagaland state tir Benjamin Yepthomi-i iba senden nung jembidang jenjang balala nung party tashi itshitsü asoshi temulung agüja inyaktü züngsemtem ayongzük aser grassroots level nung Booth Level aser Social Media dak balaka rangloker inyaktü ajungshi.

Ato Kilonser Narendra Modi indang sorkar sentong aser welfare programs balala ajanga linük nung nüburtem ajangzükba indanga pai rateta ashi.

Iba senden nung State General Secretary (Org) Abhay Giri-ia jembia liasü.

BJP Nagaland ajanga January 3 nü mezüngbuba shisadokden senden ya Dimapur nung ayongzuka liasü, kong BJP State tir Yepthomi-i National Committee züngsemtem den senden balaka amen, State Social Media Team den sensaksem aka aser Nagaland State Lok Sabha Pravas Committee züngsemtem Northeast In-charge Avinash Kohli den senden mena liasü.

Maneni Yepthomi-i State Yuva Morcha, ST Morcha, Mahila Morcha, OBC, Kisan Morcha aser Minority Morcha lenirtem den sensaksema liasü.

AR-i Noklak nungi National Integration Tour ka tenzüksü



Dimapur, Aenjeti/January 05 (TYO): Noklak district kübok arütsülen aliba yimtsüngtem nung tajemzükba jenjang nung aliba kaketshir 30 atema Assam Rifles temi January 4, 2024 nü National Integration Tour ka tenzükja liasü.

AR CAP kübok iba tour ya anogo 12 atema ayongzük aser parnoki Jorhat, Kaziranga, Dimapur aser Kohima semdangtsü.

Arütsülen aliba yimtsüngtem nungi tanurtem alima ainba

meteta parnok shisatsü tali arentsü nükjidong nung iba sentong ya ayongzuka liasü. Parnoki iba mapang otsü aketba aser linük asoshi tongtipang tesemtem semdangtsü, tongtipang nisungtem den sensaksem akatsü.

Assam Rifles temi kaketsjirtem asoshi iba ama maongka tajung agütsüba atema yimtsüng ketdangsurtem, tsürabor aser school tesayur temi pelaba lemsatepa liasü.

Mon nung Assam Rifles temi security meeting ayongzük

Dimapur, Aenjeti/January 05 (TYO): Assam Rifles temi January 5, 2024 nü Mon district kübok Wangti yimtsüng nung iba yimtsüng aser temeket nung aliba yimtsüngtem nungi GBs aser putu menden züngsemtem den security meeting cum awareness session ka ayongzuka liasü.

Iba senden nung anasa aliba

yimtsüngtem nungi GBs, village council chairmen aser village guards tem arua dena liasü. Iba senden nung Indo-Myanmar arütsülen security dak sendakba ken o balala jembia liasü.

Yimtsüng lenirtemi küm tasen salem lemsatepba den külemi Assam Rifles tem den amalitep akatsü nangzuka liasü.

Aor Rejusanger Longzüng 7...

(Tapak 1 nung...)



Akhoya nung Rejusanger Longzüng sayaba sentong nung watsütemi ken atenba noksa nung angur. (Akhoya, January 05, 2024)

Iba sentong nung Akhoya putu tatar menden nung mendenbuba Wb.Tiatemjen Longkumer aser Akhoya Shisaluyimer Telongjem tir Sp. Wabongtoshi Jamir aser Fund Raising Committee nung tayonger Wb.Limadangit Jamir nungtemi tepela o jembia liasü.

Iba sentong nung Akhoya

Watsü Teleni naklu ken tajung ka aten aser Wb.L.Tally Longkumeri sentong ania liasü. Iba sentong aser Longzüng meshiteta Akhoya Baptist Arogo nung sannüker Rev.T.Lanui sarasadem aser Longchara Baptist Arogo nung sannüker Wb.Moameren Jamiri sarasadema sentong tembang.

Ano , AKM 69 buba lokti senden nüngten nung Akhoya yimtak Lijaba anendak kimung nung Lijaba den pa anendaktsür teyi o tenu na kurakyanglu ka yanglua lir. Iba kurakyanglu ya AKM lokti senden mapang tongti tesemdanger Wb.G.Kaito Aye-i sayaja liasü.



January 05, 2024 nü New Delhi nung NCC Republic Day Camp sentong nung linük tatong Tir, Jagdeep Dhankar-i salem agizükdang tangokba noksa nung angur. Kasa noksa nung NCC DG, Lieutenant General Gurbirpal Singh-a angur.

AAP-i Rajya Sabha election atema DCW tongti, Swati Maliwal shim

New Delhi, January 05 (Agencies): Hokolbarnü Aam Aadmi Party (AAP) indang Political Affairs Committee-i January 19 nü agitsü aliba Rajya Sabha election atema Delhi Commission for Women (DCW) tongti aser party züngsem, Swati Maliwal shimogo.

Delhi nungi Rajya Sabha MP asem kümsük (term) tan ita tembangtsü aser züngsem tasepurtem shimtsü atema January 19 nü election agitsü.

Rajya Sabha MP asem-Sanjay Singh, Sushil Kumar Gupta aser Narain Dass Gupta nunger kümsük January 27 nü tembangtsü.

Ajisüaka AAP-i ND Gupta aser tang jail nung aliba AAP lenir Sanjay Singh nunger tanaben shimshitsü, ta party-i metetdaksü.

Sushil Kumar Gupta-ibo

Haryana yimtenren nung ang rangloksü pa tebilemba aliba lemsatepogo, ta AAP-i metetdaksü.

ND Gupta ya party treasurer lir aser Sushil Gupta ya Haryana unit nung AAP Tir lir. Taküm küm tatembanglen Haryana nung assembly election agitsü.

AAP-i sangdong ka ajanga, "AAP National Convenor Arvind Kejriwal leniba nung amenba senden nung committee-i tang aliba züngsem ana tanaben shimshitsü telemtetba agiogo, ajisüaka Sushil Kumar Gupta-ibo joko Haryana yimtenren nung ang rangloksü pai pa tebilemba lemsatepogo," ta metetdaksü.

Swati Maliwal ya tetsürtem temeden atema inyaker ka lir aser tang la Delhi Commission for Women (DCW) nung Chairperson lir.

Tamalen Swati Maliwal ya Delhi Chief Minister atema Advisor liasü aser Indian Against Corruption movement nunga züngsem ka liasü.

India nung ozüing alema tetsürtem anema inyakba atema ozüing tesashiba benoktsü aser tetsür-tebur kasa dang züngshitsü atema Maliwal-i inyaka arudar.

Ano külen tanga osang ka nung, Brihostibarnü Delhi court kati jail nungi re-nomination documents sign asütsü atema AAP lenir Sanjay Singh nem temelaba agüja liasü.

Delhi excise ken o dak sendakba nung AAP lenir Sanjay Singh nem tai tonglokja lir; yaküm October 4 nü Enforcement Directorate-i pa pua liasü. Pai bail temepishiba agütsü saka December 22, 2023 nü trail court kati pai mepishibaji magizük.

PM Modi-i Japan PM Kishida den mangyim jashi lemsatep

New Delhi, Aenjeti/January 05 (Agencies): Ato kilonser, Narendra Modi-i shidi ka ajanga Japan Ato kilonser, Fumio Kishida den January 1 nü Japan linük nung menoknok lendong nung nisung aika asüba atema mangyim jashi lemsatepogo.

Brihostibarnü Ato kilonser Modi-i shidi ajanga Japan Ato kilonser Kishida dang, India atema Japan ya asalentong partner tajung ka aser global

partner tajung ka lir, aser tang ama mapang ka nung India-i akokba tashi nenok yaritsü melunga dang lir, ta metetdaksü.

Hombarnü Japan nung menoknok lendong nung nisung 90 shi asü.

Modi-i Kishida dang, "January 1 nü Japan nung menoknok lendong atalokba atema jashia bilemstür aser tebilemstü katsür. Iba lendong nung asürtem kibongtem den ni

mangyim jashi lemsateper," ta metetdaksü.

"Iba lendong nung asürtem atema mangyimba kibongtem den ni mangyim jashi lemsateper. Japan nunger den aser iba lendong agi kongshirtem atema onoki aria bilemstür," ta pai lemsatep.

Hokolbarnü tashi nung iba lendong nung asürtem ajak senteper nisung 92 jungogo aser nisung 240 samar mangur, ta ketdangsertemi metetdaksü.

West Bengal nung ED team ka amak

New Delhi, January 05 (Agencies): West Bengal nung Enforcement Directorate (ED) team ka amakba sülen state Angh, Dr. C V Ananda Bose-i Mamata Banerjee-i aniba Trinamool Congress sorkar dang tekümdangtsü metetdaksüogo.

Angh-isa iba tatalokba dak sendakba nung state home secretary aser director general of police (DGP) na jaokogo.

Angh-i, "Democracy linük ka nung ozüing alema inyakba mapatem nokdangtsüji sorkar teinyaktsü mapa lir. State sorkari pei teinyaktsü shilem meinyaktetra India temzüing ajanga inyaktsü. Angh ka ama mapang tetemsü nung mera agia inyaktsü atema temzüing kübok kü nem tashi agüja lir. Tashi sayutepba aser osangkakettem ajanga amokmerentepbaji Bengal nungertemi magizüktetsü. Sorkari pei teinyaktsü shilem inyaktsüla," ta metetdaksü.

Ration ochimashi ken o dak sendakba nung Enforcement Directorate (ED) team kati ruling Trinamool Congress (TMC) nungi North 24 Parganas district nung block-level nung lenirtem ki mita aoba

mapang nung Sandeshkhali yimdak ED ketdangsertem gari amak.

Osang angazükba agi, ED-i taoba mapang Bongaon Municipality nung Chairman Shankar Adhya aser TMC lenir Sheikh Shahjahan'er ki mita aoba mapang ED team ji amak.

Trinamool lenir Sheikh Sajahan pusemertemi ED ketdangsertem aser sepaitem nokdanga liasü, iba sülen parnok meyong gari raksatsü.

Trinamool Congress (TMC) lenir, Kunal Ghosh-i, Enforcement Directorate (ED) team amakbaji parnoki party nung inyaktertem jashidaksüba agi lir, ta ashi.

Paisa, BJP tetuyuba nung ED-i TMC lenirtem anema inyaker, ta tai tongloksü.

Trinamool lenirisa, ED-i kechiba BJP lenir, Suvendu Adhikari'er kibo mita maoyer; tamalen BJP-i pa ya auer ta jembiogo, ta ashi.

Ano külen tanga osang ka nung, West Bengal BJP Tir, Sukanta Majumdar-i shidi ka ajanga Union home minister, Amit Shah dang ED amakba tatalokba ya bushisüingdangtsü atema NIA nem agüjang, ta mepishiogo.



January 05, 2024 nü New Delhi nung ITBP tetsür sepaitemi Republic Day Parade atema renemshidang tangokba noksa nung angur.

Congress lenirtemi Ram Mandir semzükba sentong nung adentsü

New Delhi, January 05 (Agencies): Congress bangdak-i Ayodhya nung Ram tekülem ki semzükba sentong nung adentsü atema party lenirtem nem temelaba agütsüogo.

January 22, 2024 nü Ayodhya nung Ram Mandir semzükba sentong nung adentsü janngar party lenirtemiba iba sentong nung adentsü akok, ta party bangdaki metetdaksüogo.

Brihostibarnü Delhi nung aliba Congress party headquarters nung Congress bangdak lenirtemi state units nung lenirtem den senden mena liasü, aser iba senden nungji taruba Lok Sabha election atema opposition INDIA teloktep nung aliba party tem den menden lemsatsü atema jembi; kasa senden nungjisa Ram Mandir onük-a süoka liasü.

Senden nungji Uttar Pradesh aser Bihar na nungi Congress lenirtemi, January 22 nü Ram tekülem ki semzükba sentong

nungji party lenirtemi adentsü akok asü? ta asüingdanga liasü.

Osang angazükba agi, Congress Tir Mallikarjun Kharge-i, Parliament nung Opposition Lenir (Rajya Sabha) ka ama aser Congress parliamentary board nung Chairpeson ka ama Sonia Gandhi tenata iba sentong nung adentsü atema jaokogo, ta metetdakja liasü.

Senden nungji Kharge-i, Ram tekülem kidangji sarasademsü janngar lenirtem dang party-i tetuyuba agütsütsü menüingdak, ta ashi.

Osang angazükba agi, Congress Uttar Pradesh unit Tir Ajay Rai aser Bihar unit Tir Akhilesh Prasad Singh nati January 20-21 anogotem nung Ram Mandir semdangtsüa akok.

Ram tekülem ki semzükba sentong nung adentsü atema Congress nungi Sonia Gandhi, Manmohan Singh, Kharge aser Adhir Ranjan Chowdhury nem tejaokba shidi agüja lir.



Jammu, January 05, 2024: Guru Gobind Singh asoba anogomong nung Jammu nung aliba Gurudwara ka nung tamangertem sarasademba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

AENJETI 06, 2023

MGNREGS taa agütsütsüla

- P Tiamongba Aier

Centre sorkari Mahatma Gandhi National Rural Employment Guarantee Scheme (MGNREGS) kübok mapa inyakerkem December 31, 2023 tashi nung Aadhaar-based payment system (ABPS) ajanga senotsü agütsütsü asoshi maparen tembangba sülen anogo matsülangtsü lemtetogo. Iba lemtet ajanga job card holders 35% aser ano "active" workers 12.7% jungnüa dak kongshir. ABPS mapa tenzükba ajanga senotsü tekaraba nung agütsütsü aser metokmeperi ajak agientsü ta Centre sorkari ashir. MGNREGS atema ABPS ya 2017 nungi tenzükba liasü aser India nung joko nisung ajak ket nung Aadhaar number lir asünung ABPS ajanga senotsü agütsüba inyakyim tajungba akümtsü ta Centre-isa metetdaktsüogo. Ajisüaka technical inyakyim ajanga tesüiba ita 21 tsüngda MGNREGS beneficiaries tenüng crore 7.6 agienogo, aser iba ya Aadhaar o job card tsüngda metokmeperi alibatem ajanga liasü ta LibTech India-i bushitetba osang metetdaktsüogo. Aadhaar ajanga senotsü agütsüba inyakyim nung senotsü magütsütetba timtem ajurur. Ano, Aadhaar aser job card tsüngda tenüng meputepba ajanga senotsü manguba den külemi ano nisung aika indang Aadhaar bank account taii yokba den mapping asüba khuretem lir. Maneni, beneficiaries-i ashiba bank account nung masü saka tanga bank account-ia sen yokba ajurur. Centre sorkaribo Aadhaar amshiba ajanga senotsü mapang shitak nung yoker ta ashir saka senotsü peria maliba ajanga mapang shitak nung sen meyokteter ta LibTech India-isa metetdaktsüogo. Centre-i January 1, 2024 nungi Aadhaar-Based Payment System (ABPS) tenzüktsü lemtetba ajanga Mahatma Gandhi National Rural Employment Guarantee Scheme (MGNREGS) kübok nisung crore 1.78 tashi agienba osang metetdaktsüogo. Iba tetezü MGNREGS kübok active workers crore 14.32 aliba nungi nisung crore 1.78-i iba teyari mangutsü. Union Rural Development Ministry indang MGNREGS portal nung January 1, 2024 nü agütsüba osang ajanga mapa inyaker nisung crore 1.78 indang ABPS linkage process metembangba shia lir. ABPS kübok mapa inyaker ka indang Aadhaar number ji pa/la indang MGNREGS job card aser ano bank account den sendakteper anungji chichiba MGNREGS job card holders nem iba mapa inyaksü atema mapang peria dang agütsütsüla. Kechiyong Aadhaar seeding aser bank accounts mapping shitak meinyak tashi ABPS inyakyim ajanga ano khuret ang teimba ajurutsü, taji Centre-i iba lemtet meyipa repringshitsüla aser seeding o mapping aibelentem metongshiba sülen ang ABPS mapa tenzüktsüla. MGNREGS ajanga yimtsüngtem nung aliba nisungtemi anogo 100 mapa inyakba sen agütsür. MGNREGS ajanga yimtsüng tia nung alirtem aser makamaitertemi tajangzük kanga angur anungji Centre sorkari technological system nung aibelen ka ajanga parnoki dak nungi iba teyari ya magientsüla.

OLEMSABANG

Indonesia lima nung Christmas

Amenla Mar, Indonesia

(Yashi adok nungi...)

- Evangelical churches aika nung Christmas anogo nung formal Christmas sentep asenok lima nung akiba ama malir. Christmas sentepji Dec. 24 aonung sentep lia sentepi arurtem chichunga benjungteber. December 25. All Christian forum Salatiga (Central Jawa) Protestant aser Catholic ayongba Christmas sendong anepdangji anepongi pezü baji (4:00AM) ano mesangwa manga lia yimti nung aliba tamangertem sentepa city center, Panchasila nung atenshia Christmas benjong tulu liasu. Mangsema liaka yangi tila tanur nungi shir tantsur tampurtem merijang aika sentepa Christmas carol nung. Iba celebration nung kanga tajung ka ajangshibaji merijang paika atema amentsu chair hire masü. VVIP-tem atema menden yutsuba mali. Shirnoksa iba nung atenter pei sasa kidang nungi pakti(mat)/plastic mika bener arua ali nung lemer amener. City Mayor, MLA aser tanishertem kasa pakti bener arua lemer lokti denkullemi tejaklen meyokteba amen. Ki sua mesura sempak temzuka suki yangluba nung sen ka dangaa meindok. Moapu nung nisungtem merijang sa merijang tesungmangtsü jangrapangra arua Tsüngrem tenungsangken tena, tsungsangteba Tsüngrem kulem. Tang onok aliba Salatiga city nung Mayor-ji Muslim lir saka pa lokti den kasaasen tamanger ken tena Christmas carol nung aten. Sentep tatem nung tanishertemi gas ballon tepong tuluka alangteber Christmas wishes tem, Yisu asoba osang zulur plastic agi yangluba decorative gas flyer nung sen inoker release anunglen yima yok. Angazukba agi iba inyakyim ya küm aika Christmas tradition ama benshia arur. Shir kima mesura shiba alidak tsukdir pa/la tia taka ta door prize ama agizuka agir. Sentep mapang ghonda ana dak tali agia liasü saka lokti sungo achi ajemba, achi ajem kecha mamshi carolji atem. Item ya angudang asen lima lokti sentep inyakyim belema aru. Naga nunger benjong ka ali nung sitting arrangement, decorations, sumpaak temzuka mesura lokti chiongtsu amshiba nung nisungtem koma belemteba aser rongsen jenti laluba medemdanga monga liasü, tulur tilar, tanur tain kecha mebandangi kanga tongmelang agi temulungjang ajunga agi Tsüngrem kulemba angudag kanga temoatsü ngua liasü. Nisungtem tenuk agi ajir machima nongteba moapu nung liaka Yi jemer asaperangba mangu. Onok aliba yimti nung yi Dokan kata mali aser kodanga yi jemer nisung ano majurudang. Stadiumtulu nungji tamalen ashiba ama amang(4:00 Am)nung nisung merijang sa mirijang sentepaka salebsari, asaperang kecha mali heart worship agiba angudang temoatsü ngua liasü. ni ku melungi belema arubaji asen Aor/ Naga nunger benjongbentsu den metemdanga asenoka Arogo, Lokti aser Keja kibong asoshi benjong bentsu inyakyim karbo tongmelang(simplify) sa melenshia aotsü junger ta ajetet.
- Ano Dec.24, 25 anogo nung Khristiantem kibong nung pei akaba tajungtiba chiongtsu renemer taruner ajak arua chiongtsu langpang renemer atar. Pei adianu Christian masuba purtem, kiyonger kidanger aser metemertem ki ka nungi ka ta semteba chichungteba senzür. Kwieka arua chiongtdier yamaji par kibong temoatsüba ta zungshia chiongtsu peria renemer atar. Onoka Christian kibong kati jaok aser yamaji oa chiongtdang joko nisung semer dak tema chionger or liasü. Nubener kibongtem balaka noklang tema chichongteba lemsateba mapang alir. Iba mapang nung kiburi chiongtsu renemba baji tapu ana; chi mechiongtdang achitsu chiongtsu tilala koba dang parnoki 'makanan kecil' ta ajar. Item chiongtsutemali nung pakti lemer table talang lang aliba nung toktsutsu. Tarurtemji ali pakti lema alidang menur item chiongtsu achir. Item chiongtsu ya alishi, manu, sweet potatoes, soya beans, mapok jang agi yangluba amtsuk tilalatem, aonsotsu sungotutem ajanga yangluba organic snacks etc etcyamala tapu meyina chips ama yanglur bottle toko-ter tema line sena yutsutsu. Iba den külemi Tzü, Bika cha with sugar, coffee aser juice balala toktsür. Item ji starter ama chia tenzükba shidakba chi-chiongba mapang atongdangbo tepok sungur alir. Ibai parnok traditional benjong culture dak sendakteba indigenous sua Christmas nunga benshia arur.
- Asen lima ama Christmas cake agutsutebaama yangi bulua mali saka yong agi mechiba Aku (bamboo basket) tila nung chi den aon tapensa aser parnok traditional chiongtsutem packed sur kibongtem nem agutsuteba amonger. Traditional chiongtsu nung Indonesia nunger ya kanga dang takar lir tat; Alishi(tapioca) agi amtsuk tapu metsu(20) dak tali yanglur. Yamala chiongtsutem kibong ka nung ka nem aguja asenok shichip aser Christmas cake agutsuteba ama parnoka aguja amonger.
- Tamangertem asoshi Küm nung ken asür(Death of love ones) belemtetbaji Christmas mapang lir. Parnoki Christmas mapang nung kinunger tasur leperi oa naro aguja belemter. Bazar nung golap naro sentsu ana temesung aser temerem betzüker yoka alibatem alia bener leper nung tasur nem aküm aguja peroka toktsür atoker.
- Tatamsa Christmas benjong ya Dec. 25 nu nung matemer. Iba benjong ya January 7 tashi activities balala agia amonger. Ozu asoshi takum küm 2023 ya mezungbuba Indonesia lima nung Khristmas amongba lir. Khristmas mongpu nung alima tasen ka nung yimya tasentem ajangshibaji kanga Christmas amongyim tasen ajangshidang item karbo asen nuburtem den lemsateb nung lesson tajung ngutisu sudi ta teyimla nung iba osang kakat ajanga Indonesia limaChristmas amongbatatsu agi lemsateber. Tatem nung küm tasen keja aser kibongtem nung Tsüngrem linibaatenba küm 2024ji sudakjang ta ayongzükur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

American Bible Society-i tang mezüng tetsür ka Tir shimogo



Dr. Jennifer Holloran

January 05, 2024: American Bible Society (ABS)-i tang mezüng ABS nung tetsür ka Tir shimogo; Dr. Jennifer Holloran ABS nung Tir aser CEO asütsü.

Küm 200 tejaklen ABS tenzükba sülen tang mezüng iba organization nung tetsür ka Tir shimmer.

Philadelphia, Pennsylvania nung amenoka aliba ABS-i sangdong ka ajanga ABS board of directors-i Holloran Tir shimba metetdaksü.

Tamalen Holloran-i Wycliffe Bible Translators USA nung inyaka liasü. March 1 anogo nung lai ABS nung Tir aser CEO mapa agizüksü.

ABS Board Chair, Katherine Barnhart-i sangdong ka ajanga, "Holloran-i tenzükba wadang nung aika ajangshia lir, la dak

kilir-lenir tangatetba lir, Laishiba tsütsü tejangraba tulu lir aser tasen apiteta inyakba sempet lir, aser itemji ajanga American Bible Society tashi itshitsü aser tarutsü nung inyaksü aliba maparen tajungba inyaktettsü," ta metetdaksü.

Holloran-isa Khristan organizations- Missio Nexus, Mission Aviation Fellowship USA aser Partners International nunga inyaka liasü.

Holloran-i Virginia nung aliba Christian institution Regent University nungi Strategic Leadership nung doctorate angu aser University of Central Florida nungi Master of business administration ngua lir. La ya kentener aser ken mejemer ka lir. 2013 küm lai Khristan kensep 'Comeon Homein' sayaa liasü.

Egypt nung Muslim nungertemi Khristantem amak

January 05, 2024: Khristmas mapang nung upper Egypt nung Muslim yimsü alia amangertemi tang tesüdak Tenla ki ka aser Khristantem meyong kiojen amak, ta Christian Solidarity Worldwide (CSW)-i metetdaksü.

Minya province kübok Al-Azeeb nung Muslim nungertemi tang tesüdak Tenla ki ka amak; iba tesem nungji Coptic Khristan 3,000 shi lir, ta CSW-isa metetdaksü.

Sorkari iba tesem nungji Tenla ki tasen asütsü temelaba agütsüba sülen Khristantemi Tenla ki tasenba foundations bo tenzükba liasü; yimsü alia amanger Muslim nungertem jagi Tenla ki asürtem amak aser Khristantem meyong kidang mi senoktsü.

CSW Tir, Mervyn Thomas-i, "Tang tesüsa Coptic Khristantem meyong ki rongdoktsüba ajanga maneni Egypt ketdangsertemi tekülem kitem yangluba dak sendakba ozüngtem yanglutsü rongdak ta nenshia metetdaksür. Khristantem nem yimsü

temeden agütsütsü nüngdak," ta metetdaksü.

"Onoki Egypt ketdangsertem dang aibelenertem pua parnok nem temerenshi agüjang ta akhanger," ta Thomas-isa metetdaksü.

Tang alima nung Khristantem alitsü linük tamajungtiba 50 rongnung Egypt ya jenjang 35buba nung lir (Open Doors World Watch List). Iba linük nung mapang shia Islamic State kiralongrartemi Coptic Khristantem amaker.

2017 küm nunga Khristantem bus ka nung monastery-i aoba mapang nung kiralongrartemi Khristan 29 tepseta liasü aser kasa küm Palm Sunday nü Alexandria aser Mar Girgis na nung kiralongrartemi bomb amshia Tenla ki amakba mapang nung nisung 48 asü aser nisung 120 dak atema yirua liasü.

Taoba ita Egypt Tir, Abdul Fattah al-Sisi tanaben Tir shimogo. Pai vote shilem 89.6 ngua liasü.

"American Bible Society-i alima nung Arogotem den senteper nisungtem nem Tsüngrem O angatetdaksütsü meranger, Tsüngrem O nung tera yanga aintsü yarir aser Tsüngrem O ajanga süngjang tangdaksütsü atema inyaker," ta Holloran-i ashi.

2019 küm October ita nung ABS Tir aser CEO, Roy L. Peterson-i pa Tir menden nungi anisüngzüksü sangdonga liasü; pa 2014 küm nungi ABS Tir inyaka liasü. Pa ABS Tir menden nungi anisüngzükba sülen maneni pa Philadelphia, Pennsylvania nung aliba Faith & Liberty Discovery Center atema ambassador at large inyaker.

ABS Tir menden nungi anenba mapang nung Peterson-i, "Asenoki senteper inyaktetba mapatem atema ni nüma atanger aser ni board of directors, staff tem, ministry partners aser financial partners-i kü dak melung lemtetba aser iba organization lenitsü atema kü nem maongka agütsüba atema pelar," ta lemsatapa liasü.

Peterson ABS Tir menden nungi anenba sülen nisung aika melentepa ABS nung Interim Tir aser CEO inyaka aruba sülen tesüsa Holloran Tir shimogo.

American Bible Society ya tajangzük mebushiba Khristan melungtet telok ka lir. Alima nung aliba oshi ajak nung Laishiba adoka nisung ajaki Laishiba züngtettsü aser angatetdaksütsü nükjidong nung parnoki inyaka arudar.

Laishiba dak sendakba nung America nunger tangatetba asadanga küm shia ABS-i 'State of the Bible' report renemer.

ANOGO ABEN TSÜNGREM DEN

Tsüngremer o nung atentenba

Saka shiba ajemalu aser tanela teraksa ali aser shibai Kü O nung atentena ali, Pa dang ni reprangtsü. Isaia 66:2.

Kodang Tsüngremi jembir nai atentener asü? Takoksang Tsüngremi ne jembiba aser ne shi temang kongshiba tatemsa jembibaji kodang liasü? Kodang Tsüngremi Yohan den jembipa tashi ajak lulaa aküm (J.A. 1:17). Kodang Pauli Damaska among nung Yisu ajuru aser Yisui pa den jembipa ali nung lao (T.M. 9:4); aser kodang Peteri Yisuji shiba angateta aru pai Yisu tsüngdang apudak aser ashi, "Ni nungi pilaang, kechiaser ni temenen nisung ka lir, O Kibuba!" (Luke 5:8).

Teyanglusangi tanga ne den jembir ta bilema marur asü? Temeshiba yimlaa nai Laishibaji azünger asü, taküm melenshidaksüba O Tsüngremi tanü ne den jembiba angar asü. Laishibai ashir, "Kibuba tsübubaji shisatsü tetenzük lir" (A.Shin 9:10). Idakji nai tetsübu agi angatsüba aser ajak nung Tsüngrem akhüm tsübutsüba mapatem lir.

Nai Lai azüngdang, nai azüngba tekong kar ajanga Tsüngremi ne den indang indanga jembir ta nai angatettsü. Tsüngrem shibai jembipa aser alima ajunga yanglu iba tesüngmangtsü shisadangang, Pai tang ne den jembir ta shisadangang. Yisui jembipa aser tasür shia arudaksü, yipru süngjemdaksü, temenen tanelatem aridok aser tashi anebtsü süra Pa nungi aruba O jagi ne taküm nung kechi inyaker? Ne dak ataloktsü takoktsüji atentenba? Tanaben nai Laishiba, temeshiba teyimla nung aji lapoka zügang.

ADF-i Khristmas mapang Uganda linük nung Khristan 13 tepset

January 05, 2024: Khristmas mapang Uganda nung Allied Democratic Forces (ADF) kiralongrartemi Khristan 13 tepsetogo aser kiojen aika raksatsü, ta International Christian Concern (ICC)-i metetdaksü.

ADF ya Islamic kiralongrar telok lir aser Islamic State telok den sendaktepa lir.

Mapang talangka nungi ADF-i Uganda aser DRC (Democratic Republic of Congo) nung Khristantem anema inyaker.

December 18, 2023 nü ADF kiralongrartemi Uganda kübok Kamwenge district nung Khristan ter tepset aser Khristmas aonunga kasa district nung Khristan ki ka amakdang tantsür ka den lar semchir ana tepsetogo.

December 18 nü ADF-i Khristantem amakba sülen Major General, Kasigazi-i Rwenzori region nung Khristantem dang kanga kümdanga alitsü aser police o tanga security agencies den amalitepa alitsü metetdakja liasü.

Iba mapang nungji Kasigazi-i Khristantem dang, "Army temi aibelener shinga mapu yonga



December 25, 2023 aonung Uganda nung Nyabitutsi yimdak ADF-i amakba Khristan meyong ki ka noksa nung angur. Iba kidang Khristan asem tepset.

tensa aziokteta lir. Onoki kobi Congo arrtsülen security tashi melii Uganda aser DRC nung itshitsü mepishiogo, ta kiralongrartemji tepsettsü," ta metetdakja liasü.

Yaküm October ita nunga Uganda Tir, Museveni-ia, "Ni Uganda People's Defense Force dang Queen Elizabeth National Parks aser Rwenzori region nung security tashi itshitsü tuyuogo," ta metetdaksü.

Uganda nung Anglican Regional partners aser Arogo nung Archbishop, Dr Stephen Kaziimba-i, Anglican international organizations-i Arogoi sorkar dang Uganda samatsütsü meranger saka sensotem kümzüksü atema makoker.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Shimulung

(n) temang telung nung aliba shi, temulungjang aser tepokpok (centrally located body organs like heart and lungs)
* Nashi ak tepset dang ojala nem teti shimulung agütsür.

Shiyashiko

(adj) temang nung timtem ngoya-ngoshi aliba (body pain)
* Tantsür tambur akümdang temang shiyashiko kanga meteter.

OLONG PAITEP # 6658

13x13 crossword grid with numbers 1-13 indicating starting positions.

TIPIEN

- 2. Mapa anepalua inyakba - (8)
- 4. Anakshinüa ait - (5)
- 5. T ____ zük - (4)
- 9. Aria bilemtep - (7)
- 11. Kidang metsüba ozü ka - (4)
- 12. Tzüma aser ali nung aliba shiruru ka - (5)
- 13. Teka kolepdak - (8)

LANGTSÜNGLEN

- 1. Teka nung enokba oset ka - (7)
- 2. Teptsü - (4)
- 3. Nok amshia raratep - (6)
- 6. Ninang tapu ka - (4)
- 7. Nüji masü - (4)
- 8. Taruba küm - (7)
- 9. Teka shitok - (6)
- 10. Süoshi agi mapet - (4)

OLONG PAITEP # 6657 TELANGZÜBA

TIPIEN:

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN:

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

NAI-A YA METETTER MA



Swiggy ta ajaba online food delivery platform nung Bengaluru-i "Cake Capital" nungja nguogo. Swiggy website nung "How India Swiggy'd in 2023" ta ser blog post ka nung Bangalore nung alirtemi 2023 küm cake 8.5 million order asü aser nisung teimbai chocolate cake order asü ta shia lir.



Assam nung gari agi tsükoktsür jena aoba ken o atema ozüng tasen ka yangluba anema Joint Forum of Transporters' Unions ajanga Hokolbarnü ghonda 48 mokdangba mapang ISBT, Guwahati nung bus garitem anendena aliba noksa nung angur. Iba mokdang ajanga Assam kübok tesem aika nung commercial vehicles aser tanga public transport mesenzü. (Guwahati, January 5)

Imphal nung Kuki-Zo nunger ki rongdoktsüba aitsür: CoTU

Imphal, January 5, 2024 (Agencies): January 4, 2023 nikongdang Imphal nung Kuki-Zo nunger kiojen rongdoktsüba aitsür ta Kangpokpi District nung Kuki-Zo nunger telok tongtiba Committee on Tribal Unity (CoTU), Sadar Hills-i metetdaksüogo.

Meitei nunger telok kati Imphal nung Chief Minister'er ki anasa iba mapa inyakba atema jashir, ta CoTU-i ashi. Yasüng 9:30 ako meta New Lambulane nung Kuki-Zo nunger ki pungu rongdoktsü. Yasüng Khaikholam Haokip, Haomang Vaiphei, Lengpao Vaiphei, Ronald Sitlhou aser Thanglenmang Kipgen nunger ki rongdoktsü.

Central paramilitary forces mapa lezmüka liaka nisung telok ka nem kechiba iba mapa inyakdaksü ta CoTU General Secretary Lamminlun Singsit-i ashi. Kuki-Zo nunger tsüngda mepetmesü adokba sülen Central Paramilitary personnel-i New Lambulane-Checkon tesem ajunga nüka miter, ta Singsit-isa ashi. "Meitei nungeri central sepaitem hai ta melii iba mapa inyakba ya internal security atema lendong lir aser Centre sorkar den rara menaba lir" ta paisa ashi. "Lendenlen aliba district tem nungi Armed Forces Special Power Act (AFSPA) agienba ajanga Meitei

kiralongraba teloktemi yimjak nung prangpong bener senzür aser ozüng alema mapa inyaksangshir" ta CoTU General Secretary-isa metetdaksü. Anungji onoki Union Home Ministry dang lendenlen aliba district tem nung maneni AFSPA benoktsü mepishir ta paisa shisem. Imphal nung ozüng mali kümogo aser nübo teimba aliba Meitei nungeri Kuki-Zo nunger kiojen rakatsür aser rongdoktsür ta Singsit-isa metetdaksü. Union Home Ministry-i Kuki-Zo nunger kiojentem kümzüka ayutsü atema army mapa lezmüksütsü mepishir ta CoTU-isa ashi.

Sorkari HNLC dang yimjung olemtep nung adentsü ayonger

Shillong, January 5, 2024 (Agencies): Meghalaya sorkari Hynniewtrep National Liberation Council (HNLC) dang yimjung olemtep nung maneni adentsü ayongzükogo.

"State sorkari iba tensa atema inyakdar. Onoki media nung dang osang angu aser tang tashi ano sorkar dang mashi lir" ta Meghalaya minister Paul Lyngdoh-i ashi.

HNLC dang yimjung olemtep nung maneni adentsü mepishir. Onük aika

jembitepa aruogo aser telok anaprongi lemtet ka agitsüsa olemtep nung shilem agitsü imlar ta Lyngdoh-isa ashi. Hynniewtrep National Liberation Council (HNLC)-i Centre aser Meghalaya sorkar den yimjung olemtep nung madener ta metetdakja liasü. "Onoki nür sorkar den yimjung olemtep nung madener" ta HNLC chairman-cum C-in-C Bobby Marweñ aser General Secretary Saiñkumar Nongtraw nati

Ministry of Home Affairs (MHA) dangi shidi ka zülüogo. December 31, 2023 nü zülüba shidiji AK Mishra, advisor MHA for Northeast ajanga MHA dangi yok. "Onoki akhangba onüktem meinyakba atema olemtep nung madener. Item tebilemstsütem atema meinyakra onok political demands magizüksü" ta HNLC-i ashi. "Onoki prangpong amer raratsüla ta bilemer" ta HNLC-isa metetdaksüogo.

Union finance minister Nirmala Sitharaman-i Sikkim semdangtsü



Nirmala Sitharaman

Gangtok, January 5, 2024 (Agencies): Union finance minister Nirmala Sitharaman-i Honibarnü Sikkim semdangtsü sentong lir. Nirmala Sitharaman-i Sikkim nung anogo asemnü amongtsü aser idangji Gangtok nung aliba Manan Kendra nung credit outreach program ka nung adentsü. Union Finance Minister-isa East Sikkim nung international border anasa aliba Kupup

yimtsüng semdangtsü. Iba tesem ya kanga tongtipang lir aser Sitharaman-i iba yimtsüng semdangba ajanga Centre sorkari India'er arrtsütem junga ayutsü aser renloktsü tebilemba sayur. Laisa NABARD ajanga anepaluba credit outreach program ka nung shilem agitsü. January 8, 2024 nü Nirmala Sitharaman New Delhi-i apusoa aotsü.

TEPELA TASOBA ANOGO

6th January 2024

Tsürabur, Mrs. Rongsenlemla, Changtongya, arishi küm 90 abensa alitsüsa Tsüngremi moatsü nung Pa tenüng asanger.

Tenüngsang Ken 118:24

Kibubai yangluba anogoji ibai lir. Asenoki pelateptsü aser iba nung pela-a alitsü.

~ Temeim Chirnur aser Semchirtem.



GOVERNMENT OF NAGALAND

OFFICE OF THE DIRECTOR GENERAL OF POLICE

NAGALAND :: KOHIMA.

NO.PHQ (D-II)CLO/2014(Pt/)

Dated Kohima the3rd Jan' 2024

TENDER NOTICE

Sealed tender are hereby invited for supply of Clothing/Equipment Items for Nagaland Police, Nagaland Armed Police (NAP) and Indian Reserve Battalions (IRB) for the year 2022- 2023.

Interested tender(s) may collect detailed tender notice from the office of the Director General of Police on payment of Rs. 500/- (Rupees five hundred) only on any working days and shall be issued with effect from 06/01/2024

Last date of receipt of tender 05/02/2024 till 12.00 hrs and shall be opened on the same day at 13.00 hrs in presence of tenderer(s).

Sd/
(RUPIN SHARMA) IPS
Director General of Police
Nagaland: Kohima.

Israel minister-i rara sülen Gaza atema sentong yanglur

Tel Aviv, Aenjeti/January 05 (Agencies): Gaza nung Israel aser Hamas tsüngta rara tembangba sülen tarutsü nung yimsü asütsü atema Israel Defence Minister Yoav Gallant-i sentong kar benok.

Yangji Palestine nunger ozüng kar dang amshitsü, ta pai ashi. Hamas-i Gaza nung yimsü masütsü aser security ajak Israel-i ketdangsütsü, ta ashi.

Iba sentong temai adokba mapanga Gaza nung maneni rarar aser tesüiba ghonda 24 tsüngta nisung aika tepsetogo, ta Hamas meyong health ministry ajanga ashi.

US Secretary of State Antony Blinken-i tan hopta iba region semdangtsü lir. Pai iba mapang occupied West Bank nung Palestine nunger ketdangsür aser Israel nunger lenirtem ajurua jembishinü akatsü imlar.

Lebanon yimtiba Beirut nung Mongulbarnü Hamas lenir

Saleh al-Arouri tepsetba sülen region nung tensa tamajungba kumer alidang pai semdangtsü. Al-Arouri tepsetba atema Israel tenüng asener saka Israel-i pa tepsetba nung shilem agiba mesüira magiba kecha shia mali.

Israel nungeri bomb poklokja amakba ajanga tesem ajungalen teraksa agi sünger aliba Gaza tanaben yangertsü asoshi linük balalai shilem agitsü.

Iba sentong kübok kidanger Egypt shilema lir.

Ajisüaka document nung iba tesem ketdangsütsü Palestine nunger mapa asütsü ta shia lir.

"Gaza nung Palestine nungeri alir, anungji Palestine nungeri ketdang asütsü, saka Israel anema mapa kecha meinyaktsüla," ta Gallant-i ashi.

Iba sentong ya cabinet senden nung mejembi aser Israel Ato Kilonser Benjamin Netanyahu-i yimjak nung iba sentong indang jembia mali.

Hamas-i October 7 nü amakba

indang bushisüngdangtsü asoshi tenüng benokba nung minister kari tai pua senden melitet ta ashir.

Gaza nung rara sülen indang jembiba ajanga Israel nung mangatettep adok.

Netanyahu'er sorkar nung far right-wing züngsem kari Palestine senso ya Gaza yutsür oa tesem balala nung jenoka alitsü ajungshitsüla, ta ashir aser yangji Jewish nunger tanaben lidaktsütsü asoshi mangatettep aliba sentong nung region nung aliba danga linüktem aser Israel tembar linük kari memulunger.

Par külem cabinet züngsem kari benokba dang nungibo Gallant-i benokba ya ang tajungba ama züngshitsü akok, saka Palestine lenirtemi magizütsü, kechiaser iba rara tembangba sülen iba territory ketdangsütsü ya Gaza nung alirtem nem tashi agütsütsüla ta ashir.

(Maneni tapak 8 nung...)

North Korea-i South Korea indang asetkong anasa artillery khaloktsü

Seoul, Aenjeti/January 05 (Agencies): Hokulbarnü North Korea-i South Korea indang asetkong ana anasa artillery shells 200 dak tema khaloktsü, ta Seoul indang defence ministry ajanga ashi aser iba inyakyim yagi Korean peninsula nung yimjung amokmerener ta shia liasü.

North Korea ya South Korea aser US den raratsü renema lir ta iba linük lenir Kim Jong Un-i tekumdangtsü aiben ashiba sülen injang ya khaloktsü. Artillery shells khaloktsüba sülen asetkong

ana nung alirtem dang iba tesem yutsür ainshitsü totuyuba agütsü, koba 2010 küm North Korea-i asetkong ka nung injang tulu khaloktsüba sülen mitkar tsütsü iba tensa ta tamajungtiba alitsü.

"Ibai rara mesüba mapa ka lir, koba ajanga Korean Peninsula nung yimjung amokmerener. Iba tensa asoshi North Korea-i khuret abentsü aser iba ama inyakyim tangsa anentsü ajungshir," ta South Korean Defence Ministry ajanga sangdong ka nung ashi.

"Ozü mitkar temi United

States den teka amteper kanga junga tensa asadangtar, aser North Korea-i rara mesüba asoshi tapet mera agitsü."

South Korea indang Yeonpyeong Island ya Yellow Sea nung lir. Iba asetkong ya Incheon nungi anüolen kilometre 80 shi aser North Korea indang Hwanghae Province tzükum nungi south tsütsü kilometre 12 pilar lir. Baengnyeong Island nung ketdangsür temia nüburttem dang iba asetkong azüngtsütsü totuyuba agütsü ta ashir.

(Maneni tapak 8 nung...)

Pakistan Senate nung Feb. 8 general elections menutsü lemtet

Islamabad, Aenjeti/January 05 (Agencies): Pakistan general elections menur agitsü takhangba agüja pangzüng ka renemogo, koba February 8 nü agitsü liasü.

Linük indang parliament nung upper house ajanga iba pangzüng ya Hokulbarnü session ka amendang agizük, kong senator 97 aliba nungi parnok 14 dang aden aser züngsem kati iba pangzüng anema vote agüja liasü.

Independent legislator Dilawar Khan-i benokba pangzüng nungya linük nung tensa majungba aser asüka aliba mechi election anogo thinentü shia liasü.

Pakistan indang interior ministry ajanga tejanga yimten yimsüsür takum asoshi lendong lir aser talisa Khyber Pakhtunkhwa aser Balochistan province tem nung lendong timtem tali atalokba indang shia lir, ta Khan-i iba pangzüng nung shia liasü.

Tzüngsang-mopung kanga temokong asüba yong political party temi nübu yima jajatsü kanga tasak kumdaktsür aser iba yongji election nung vote agütsür ajema alitsü akok, ta pai ashi.

"Pakistan nung aliba tesem ajanga nungi nüburttem aser political party ajak nem shilem agidaktsütsü mechi February 8, 2024 nung agitsü aliba pangzüng nung shia liasü.

Pakistan linük kumtener küm 75 liyonga arudang general elections 11 ben agia lir aser asemen (1985, 1997 aser 2008) February ita agia lir.

Taoba küm August ita parliament indang lower house anenba sülen Pakistan nung general elections ya November ita agitsü liasü.

Iba sülen election ketdangsütsü asoshi Ato Kilonser Anwaar ul-Haq Kakar kübok caretaker government ka amenok.

Ajisüaka linük indang nütütsüng yongsük asadanga nung ajemdaker constituency tem tanaben yanglushitsü asoshi mapang tali nungdaker, ta Election Commission of Pakistan (ECP) ajanga shia liasü. Nütütsüng yongzük züngdanga maparen (census) ta taoba küm temogo.

Nütütsüng yongsük million 241 aliba South Asia linük nungya küm aika yimtenren aser rongsenketzüng tsütsü timtem balala ajurua arur.

Opposition party tongtiba, Pakistan Tehreek-e-Insaf (PTI) lenir aser taoba ato kilonser Imran Khan ya taoba küm August ita nungi tepuokdak yua lir aser yangji pa anema ken o aika benoka jembir.

Kasa mapang Shehbaz Sharif lenisüba kübok taoba sorkari bushiba yong par party lenir aika party yutsü.

Tawa February 8 elections atema Khan-i nomination papers agütsüba election commission ajanga magizük. Commission ajanga danga opposition candidate meyririjang aika indang nomination papers magizük.

Pakistan nung tensa tamajungba kumogo aser 2023 küm telungpur telok balalai lendong agütsüba 600 dak tema liasü, koba 2022 dang shilem 60 dak tema agi timba lir, ta Pakistan Institute for Conflict and Security Studies (PICSS) ajanga ashir.

Item lendong atalokba ya shilem 93 jungnüa Khyber Pakhtunkhwa aser Balochistan province tem nung lir ta PICSS data ajanga ashir.



Jan. 5, 2024 : Tekumzükür temi Wajima, Ishikawa prefecture nung nisung bushiba mapang tangokba noksa ka yangi angur. Tantsür ana ki laor alidak nungi agitet, saka January 1 nü menoknok magnitude 7.5 anokba sülen nisung takum ngutettsü teimla sama aor. Japan tiyonglen iba menoknok anokba ajanga Hokulbarnü tashinung asür nisung 92 jungogo aser nisung 242 samar bushir, ta ketdangsür temi ashir.

Brisbane International: Jordan Thompson-i Rafael Nadal tsükdaktsü



Brisbane, Aenjeti/January 05 (Agencies): Spain nungi tennis asayar mongin, Rafael Nadal mapang tatsüka asayamung kecha nunga shilem magi arur tang tasayadak Brisbane International quarter-final Hokulbarnü Australia nunger Jordan Thompson den ghonda asem sen minute 25 tashi asayar tsükogo.

Pat Rafter Arena nung iba asaya set tanabuba nung Thompson-i match points asem tashinungi jembua Nadal madak 5-7, 7-6 (8/6), 6-4 agi akok.

Yiruba mechi ita 12 jungnüa tennis asayamung nungi pila lir tang mezüngbuba asayamung nung shilem agidang quarter-final nung Nadal-i mezüng set agiba sülen pai straight set nung takok angutsü amai repranga liasü.

Ajisüaka Thompson-i temulungtetba tulu nung asaya tanabuba set agi.

Nadal ya asaya tiyong nung khen temang anepalua liasü.

Pai iba sülen maneni asaya saka Thompson-i pa nem maongka magütsü.

"Ni match points nungi jembua ni amadok. Brisbane nung quarter-final nung Rafa nadak takok anguba ya aser hard court nung mezüngbuba semi-final asayatsü ya ni kanga pelar," ta asaya temer Thompson-i ashi.

Thompson ya semi-finals nung second seed Grigor Dimitrov den asayatsü. Bulgaria nunger Dimitrov-i quarter-final nung Australia nunger Rinky Hijikata madak 6-1, 6-4 agi takok ngua lir.

Semi-final asaya tanabuba nung top seeded Dane Holger Rune aser Russia nunger Roman Safiullin asayatsü.

Rune ya kanga junga asayaba mapang lir, shibai Australian qualifier James Duckworth madak 6-2, 7-6 (8/6) agi takok angu aser Safiullin-i Italy nunger Matteo Arnaldi madak 7-6 (7/4), 6-2 agi takok

ngua liasü.

Tetsür kija asaya nung Aryna Sabalenka-i Daria Kasatkina madak straight-sets agi takok ngua semi-finals tongogo.

Sabalenka-i 6-1, 6-4 agi takok anguba ya Australia nung atonga takok 14 buba anguba alitsü.

Belarus tsür Sabalenka-i Russia tsür Kasatkina madak mezüng sen minute 32 nung akok saka tanabuba set kanga saka asayar ghonda ka ser minute 26 nung takok angu.

Sabalenka ya semi-final nung külem linük nungi Victoria Azarenka den asayatsü aser ibai 2023 Australian Open final tanaben asayar amai asütsü.

Taoba mapang Grand Slam champions Azarenka aser Elena Rybakina ya yimya balala nung semis atong.

Anaben Australian Open asayamung takok marok nguteta alila Azarenka-i third-seeded Latvia tsür Jelena Ostapenko den ghonda ana ser minute 30 asayar 6-3, 3-6, 7-5 agi takok ngua liasü.

Quarter final danga ka nung Russia tsür Anastasia Potapova tepok nung timtem aliba mechi asaya nungi anentsüsa akum aser Rybakina nem takok agüja liasü.

Rybakina ya Czech tsür Linda Noskova den asayatsü, shibai Russia tsür arishi küm 16 tain Mirra Andreeva madak 7-5, 6-3 agi takok ngua liasü.

Ranji Trophy 2023-24: Nagaland aser Hyderabad asayaba osang

Dimapur, Aenjeti/January 05 (TYO): Nagaland Cricket Stadium, Sovima nung Nagaland aser Hyderabad tsüngta Ranji Trophy asaya mezüng anogo nung Hyderabad-i Overs 76.4 nung wicket pungo out sür runs 474 nguteta declare asü.

Hyderabad nungi Rahul Singh Gahlaut-i runs 214 angu, Tanmay Agarwal-i runs 80 aser

Tilak Varma (Captain) ajanga runs 100 (not out) yangluteta liasü.

Iba inning nung Nagaland nungi Karan, Nagaho, Imliwati, Khrievitso aser Jonathan nungeri wicket ka-ka agia liasü.

Hyderabad-i runs 474 nung declare asüba sülen Nagaland asoshi mezüngbuba innings nung Joshua Ben Ozukum-i runs 26 (not out) aser

Sedezhalie-i runs 7 (not out) nung lia asaya anen. Nagaland ya Overs 11 nung runs 35 ngur Nzanthung Y Mozhui out sür lir.

Nagaland ya ano runs 439 agi tajemba lir aser tananü buba ya jangratemtsüka asütsü, kechiaser taoba mapang Ranji Trophy koka aliba Hyderabad team yagi anepdang azüngtzü makong lia Nagaland batting line up tendangtsü.

Israel minister-i rara sülen Gaza...

Netanyahu-i Gaza nung yimsü asütsü indang tejangja yinjak nung mejembi aser pai Gaza nung rara ya ano ita ishikabo agitsü akok ta shia lir aser Hamas okshia samatsütsü nangzüka lir.

Gallant indang sentong nungya Israel mitkar temi Gaza nung ano raratsüba nukjidong indanga shia lir.

Gaza Strip north tsütsü Israel Defense Forces (IDF) ajanga 'targeted approach' tali tejangjaba agitsü aser yangji tesem balala meita aotsü, longpok raksatsütsü, tayimtsü aser alilen nungi amaktsü ta pai ashi.

South tsütsü Israel mitkar temi Hamas lenirtem tsüngsü

pua aotsü merangtsü aser Israel nunger pua alirtem kumzüktsü, ta Gallant-i ashi.

Brehostibarnü IDF temi Gaza City aser Khan Younis densema Gaza indang north aser south nung amak ta ashi.

Parnoki "terrorist infrastructure" nung amak aser sepaitem anasa tapoktsü oset pokdaktsütsü merangba telungpur tepset ta ashi.

Parnokisa tayimtsü amshia amakdang Palestinian Islamic Jihad lenir Mamdouh Lolo tepset ta ashi.

Tesüiba ghonda 24 tsüngta Strip nung nisung 125 tepsetogo ta Gaza nung aliba Hamas meyong health ministry ajanga ashir.

(Tapak 7 nungi...)

Khan Younis anüolen tsütsü al-Mawasi nung Israel nungeri tayimtsü amshia amakdang tilatanur toku densema nisung 14 tepset ta health ministry ketdangtsür kati ashi.

Israel-i tayang kepzüka Gaza nung amak tenzüker Brehostibarnü tashinung nisung 22,400 dak tema süogo aser aji Gaza Strip nung aliba nütsüng yongsük million 2.3 nungi shilem ka jungnüa lir, ta Hamas meyong health ministry ajanga ashir.

Hamas telungpuri October 7 nü Israel south tsütsü ajungbena amakdang civilian tem timba sür nisung 1,200 tepseta ano nisung 240 shi pua bener aoba sülen Israel-i Gaza Strip amak tenzüker.

AR-i Peren nung volleyball asaya ayongzüker



Dimapur, Aenjeti/January 05 (TYO): Assam Rifles temi January 4, 2024 nü COB Peren nung "Khelo India Initiative" omen kübok Peren Youth Club den friendly volleyball match ka ayongzüka asaya liasü.

Lanurtem temaba jenjangi ajungkettsü asoshi saisapong ya hadir ka ama amshitsü aser

Armed Forces nung saisapongertem asoshi sapang agütsütsü nukjidong nung iba asaya ya ayongzüka liasü.

Iba asaya nung lanur 9, officer ka aser jawan 10 shilem agia liasü. Assam Rifles temi iba ama sentong tajung ayongzükerba atema Peren Youth Club ajanga pelaba lemsatsep.

MLA Azo-i Küm Tasen nung... (Tapak 1 nungi...)

Delhi nung amenoka aliba United Christian Forum (UCF)-i September 7, 2023 nü report ka agütsüba nung "2023 tenzüker ita 8 buba tashi nung India nung Khristantem dak 525 amak aser iba ba Hindu nunger teloktemi inyakba liasü" ta shia lir. Sarasadem sentongtem meinprongba aser tamangba yimsü dak sendakba benjungtem memungdaktsüba tatalokba ataloka arur, ta Azo-isa metetdaktsü.

Kali Sena tanishisangi Haridwar nung Christmas benjung memungdaktsütsü ashiba osang December 23, 2022 nü sangdonga liasü aser iba indang video kanga

prokshiogo ta Azo-isa ashi.

India nung Khristantem kanga amaker aser ruling party lenirtem den tongti ketdangtsürtemi tanga tamangba yimsü amangertem anema jembiba ajanga India ya Secular state ka aser alima nung Democracy tulutiba ta asüba ya putiotsü ka akümstü ana nung lir ta paisa ashi.

Ajisüaka, Prime Minister Narendra Modi-i Christian tem den Christmas benjung amongba atema tenüngsang agütsür ta MLA Azo-isa ashi.

January 5, 2024 nü Phek Student Union (PSU) 65 buba General Session nung pai item onüktem jembia liasü.

North Korea-i South Korea... (Tapak 7 nungi...)

Kim-i constitution nung par linük jenjang ya nuclear power ta inokba aser inter-continental ballistic missiles aika tendangba sülen Korea linük ana tsüngta tesendaktep tamajungba akum.

Pyeongyang nung küm tatem tongtipang sentong yangluba senden ka nung Kim-i South Korea nung nuclear amshia amaktsü amokmeren aser mashi mapang rara tenzüksü aser aji masüadang linük indang mitkar tashi ulushitsü ashi.

United States den mitkar tsütsü timtem balala lir ta Kim-i tai tongloktsü aser par sepaitem dang rara mapang tasü ita telangzüba agütsütsü asoshi renema alitsü totuyuba agüja

liasü.

Tsükchir temi tebilemdangba makai North Korea amaktsü merangba mechi Korean peninsula nung mashi mapang rara tenzüksü akok, ta iba senden nung jembia liasü.

Taoba küm US-i nuclear-powered submarine ka South Korea indang rongnendak Busan yimti leni yoka Seoul aser Tokyo den külemi drills agidang long-range bombers tem yoka liasü.

Washington-i Korean peninsula nung lungjemer drills agidang B-52 bombers ama nok-nü tesashi yokba ya asaa nuclear rara mesüba mera ka lir, ta North Korea-i aija liasü.

BILEMDANGANG

"Tajungba akümstü merangba taküm dang nungi tajungbabo melitetsü."